

anderen truweliken to behulpen sin in alle der wise also vorscreven  
 is. Scheghe ok jenich twidracht twischen uns und den unsen und  
 dem vorbenomden greven Borchard von Reynsten und den sinen bin-  
 nen disser voreynunghe, des god nicht enwille, dar scolden de de  
 5 schelehaftich worden weren bin achte daghen orer iowelk sine fründ  
 twene to kesen, de scolden se in twey setten und gütliken entrichten  
 mit früntscop oder mit rechte bin vier weken. Konden se des nicht  
 eyn werden, so scolden se dat bringhen an den overman, den we bey-  
 der sit dar to eyndrechtliken dar to koren, de scolde se irscheden bin  
 10 vier weken mit früntscop odir mit rechte: dar scolde dat bi bliven.  
 Were ok dat unsir medeborghere welk tehn welde in sine stede dor-  
 pere oder gebede des vorbenomden heren von Reynsten, de mochte dat  
 don mit unsem willen ane unse vordechnisse; und in welke stad oder  
 dorp se toghen, so scolde de vorbenomde here von Reynsten uns und  
 15 den unsen helpen bin achte daghen, dat uns und den unsen von den  
 weddirvöre des se uns plichtich weren. Were ok dat des ergenanten  
 heren lüde jenich sculdich were den unsen, dat scolde de de men scül-  
 dich were vorkündighen om, dem scolde he rechtes helpen over de  
 sine bin achte dagen. Schege des nicht, so mochten se ore recht söken  
 20 mit gheistlikem oder mit wertlikem wor se konden, dat scolde wedder  
 on nicht sin. Were ok dat me wor wepenere leggen scolde to eynem  
 ridenen krige, dar scolde he siner man viere to senden, und we vor-  
 benomden stede, eyn iowelk stad unsir medeborgere twene ute dem  
 rade up eyne lechlike stede, de scolden sek des voreynen, ef se konden,  
 25 wo vele lüde dat me dar leggen scolde. Konden se des nicht don, so  
 scolden se dar von stund an eynen overman kesen, und wat de dar  
 um hete in den neisten achte dagen, dat scolde men also utholden.  
 Ok so enscolde we uns noch enwillen mit nemanne vorbinden anders-  
 wor, we endeden dat mit sinem willen. Geschege ok dat we oder de  
 30 unsen in des vorbescreven greven Borchardes steden dorperen oder  
 gebede wat kopen welden dat veyle were to unsir nottorft, ed were  
 wat dat were, des enschal he uns nicht vorbeden ut to vorende, sunder  
 dat scolde sin gude wille wesen. Ok so enschal unsir eyn des anderen  
 vyand nicht werden up eyn unrecht in disser vorbintnisse. Alle disse  
 35 vorbescreven stügke und artikel love we entrüwen greven Borcharde  
 von Reynstein stede und gans to haldene ane aregelist und hebbet des  
 unse ingesegele gehengt an dissen bref, de gegheven is na goddes bort  
 dusedent jar dreihundert jar und in dem dren und achtentigsten jare in  
 twelften dage.

40 Original mit zwei Siegeln im Haupt-Landes-Archiv zu Wolfenbüttel s. R.  
 Blankenburg.